





8020



E. MARTIN. ROL.





DECLARATION

DV ROY, SVR L'ARREST

D'ABSOLVTION DONNE EN

sa Cour de Parlement de Paris, le

trentiesme iour de Mars, Mil six

cens & deux, en faueur de Maistre

Pierre Ioly son Procureur general

ez ville de Metz, Pays Meysin &c.

29.



A PARIS. 485.

Par René Ruelle, Imprimeur

& Libraire.

M. DC. II.

Case

F

39

.326

1602 Fed

THE NEWBERRY
LIBRARY



³
HENRY par la grace de
 Dieu Roy de France & de
 Nauarre. A tous presens &
 aduenir, Salut, C'est le pro-
 pre d'un bon iuge d'auoir
 soing que la calomnie ne preuale sur l'in-
 nocence: & de pourueoir que les proce-
 dures contre personnes accusées se facent
 avec tant de considerations, que l'hon-
 neur des bons, lequel la medisance auroit
 mis peine d'abaisser, en demeure plus re-
 leué. Et quand l'accusation rencontre au-
 cun de nos officiers, qui pour le respect de
 sa charge, oultre le debuoir commung,
 doibt estre a l'endroit de tous, exemple de
 fidelité & de preudhomme, les mesmes
 procedures se font avec plus de circon-
 spections, & le temps qui est pere de verité
 en doibt estre le directeur. Cest pour-
 quoy par l'arrest donné en nostre Cour
 de Parlement de Paris le vingtiesme iour
 du mois de Septembre dernier, il est per-
 mis a Nostre Procureur General en icelle
 d'informer plus amplement contre Maif-
 tre Pierre Ioly nostre Procureur Gene-
 ral ez ville & pays de Mets, Toul & Ver-
 dun, accusé d'auoir participé a l'entrepri-

se faicte contre ladite Ville de Mets Et iceluy ce pendant eslargy par nostre bonne Ville de Paris & ses faux-bours. Car combien que nostredite Cour de Parlement n'eust trouué contre icelluy Ioly aucune charge, elle auroit neautmoings pour sa qualité & c'elle de ladite accusation vsé de ces formalitez, que nous aurions iugées fort propres pour iustifier son innocence par le temps, & ses circonstances, & faire congnoistre a chacum rien ne luy auoir esté fauorable que son integrité, & preud'hōmie, desquelles nous n'auons iamais fait doute, comme elles sont assez confirmées par l'arrest de nostredite Cour de Parlement du trentiesme iour de Mars dernier, par lequel elle a eslargy & eslargit ledit Ioly par tout, qui est la forme la plus solennelle dont elle a accoustumé d'vser en l'absolution des accusez: qui pourroit & deburoit suffire pour rendre certain tesmoignage par tout de l'innocence dudit Ioly: mais d'autant que telle forme n'est vsitée n'y cogneuë esdites Villes & Pays de Mets, Toul, & Verdun, ne parmy les voisins d'icelles qui demeurent soubz autre souueraineté, du iu-

gement desquels ^s l'absolution est toujours conceüe & déclarée par mots si expres, que l'innocence de ceux qui sont absous ne peult estre calumniée: Afin que sa foy & loyaulté a nostre seruice ne puisse estre reuocquee en doubte entre ses concitoyens, & par tout ailleurs ou il est recongneu: A ces causes, Sçauoir faisons qu'estant deuement informé de l'innocence dudit Ioly, tant par ledit arrest, que par ses actions & deportemēs passez: bien mémoratif aussi des fidelles & recommandables seruices qui nous ont esté faits par luy, tant en la charge de nostre Procureur Général esdites Villes & pays, qu'en plusieurs bonnes grandes & importantes occasions esquelles il a esté employé par nous & nos prédécesseurs: Nous auons de l'aduis de nostre Conseil, & de nostre certaine sçience, plaine puissance & auctorité royalle dit, & déclaré, disons & declarons par ces présentes signées de nostre main, ledit Ioly estre non seulement pur & innocent des cas & crime a luy imposez, mais aussi tresdigne de la continuation de nostre bienueillance & faueur. Voullons & ordonnons a ceste

occasion qu'il soit reongneu tel d'un chacun. Et qu'il luy soit permis de faire publier par tout ou il iugera necessaire nostre presente déclaration, comme aussi de la faire enregistrer es registres des greffes desdites Villes & Pays, pour mémoire perpetuelle a l'aduenir de son innocence, fidelité & preudhommie. Car tel est nostre plaisir. Et afin que ce soit chose ferme & stable a tousiours, nous auons fait mettre nostre seal a celdites presentes. Donné en nos deserts de Fontaine-bleau au moys d'April, l'an de grace mil six cens deux, & de nostre Reigne le treisieme.

*Ainsi signé HENRY, Et sur le reply.
Par le Roy. RVZE', Et a costé
VISA. Et seellées d'un grand seal en
cire verde pendant à las de soye.*

Coppie del' Arrest.


Extrait des registres de Parlement.

VE V par la Cour la requeste a elle présentée par Maistre Pierre Ioly Procureur du Roy a Mets, & pays Messin, contenant que par le proces sur lequel l'arrest du vingtiesme Septembre mil six cens vn estoit interuenue, la Cour n'ayant trouué aucune charge contre le suppliant lors prisonnier en la Conciergerie du Palais, elle auroit neanmoins pour la qualité de l'accusation, permis au Procureur General informer plus amplement, Et ce pendant le suppliant elargy par ceste ville & faux-bourgs, a la charge de se représenter toutesfois & quantes que par ladite Cour seroit ordonné: depuis lequel arrest il n'y auroit esté satisfait, qui soit venu a la connoissance du suppliant lequel seroit toujours demouré en ceste ville a grans frais, éloigné de sa maison, & priué de l'exercice de sa charge: requeroit estre elargy par tout, & renuoié pour faire sadite charge: sans preiudice neanmoins de repeter ses despens, dommaiges & interests contre

ceux qui se trouueront luy auoir fuscité
ceste faulse & calumnieuse accusation:
veu ledit arrest, cōclusions du Procureur
General du Roy, & tout considéré: La-
dite Cour a elargy & elargist ledit sup-
pliant par tout, Faict en Parlement le
trentiesme iour de Mars, Mil six cens
deux.

Ainsi signé

VOISIN



Lettres a Monsieur de Sobolle le ieune.

MONS. de Sobolle, vous verrez l'Arrest & la declaration que mon Procureur Ioly vous monstrera : Ce sont pieces bien deuës a son innocence, laquelle a suffissamment esté verifiée & rien ne peut estre mieux esclaircy, Quand i'en aurois eu quelque doubte, ce qui ne mentra iamais en la pensee, vostre frere me l'auroit assez leue. Je suis bien ayse de les auoir veu bien remis ensemble, mon seruiue ne peut qu'estre bien faict quand il y a bonne intelligence entre mes seruiteurs: Je sçay que mondit Procureur ne manquera au respect qu'il doibt a vostre frere & a vous en son absence: Aymez le aussi de vostre costé, quand les volontez sont reiointes, le cal les rend plus fortes. Tenez la main que le Sieur President Viart face ce que ie luy mande pour la publication desdits arrests & declaratiõ,

& vous me ferez seruire tres-agreable.
 Priant Dieu qu'il vous ayt Mons. de
 Sobolle en sa sainte & digne garde. Es-
 crit à Fontaynebleau le 11. iour d'April
 1602.

Ainsi signé
Et plus bas

HENRY
 RVZE.

Et en la superscription
A Mons. de Sobolle commandant
pour mon seruire a Metz & pays Messin
en l'absence du Sieur de Sobolle son frere.

Autres lettres a Monsieur le President.

MONS. le President, Je n'ay iamais eu que toute assurance de la fidelité de mon Procureur Ioly: les serui-ces qu'il ma rendus purgeoyent assez en mon endroit toute l'accusation dresse contre luy: Mais comme a ceux qui ont c'est honneur de me seruir en pareille charge que celle que ie luy ay commise ne fust pas d'estre gens de bien en effet, ains en doibuent auoir la reputatiō entiere, telle qu'il se l'estoit cōseruee iusques au iour de ladite accusation: iay trouué bon qu'il fust plus amplement informé contre luy a ce que la longueur du temps, & l'observation des formalitez plus exactes en accusations de cette qualité, donnassent a congnoistre a vn chacun que sa iustification est entierement deuë a l'integrité de sa vie: Et que son absolution n'est procedee d'aucune faueur que de celle que sa propre innocence bien recongneuë luy a fort largement apportee: dont ie luy ay baillé mes lettres de declaration, lesquelles ie veux que vous faciez lire en vostre siege, a huits ouuers, & en telle & si gran-

de assemblée des gens de la iustice, de la garnison & du peuple que luy mesme desirera, & que vous les faites enregistrer avec son arrest, pour estre a la posterité vn tesmoignage & lettres de Chartre de son innocence, de laquelle ne peuuent auoir doubte que ceux qui ne l'on congneu que par le bruit de ladite accusation, ce que de vous mesmes vous ferez encore entendre a tout le monde, & vous m'en ferez seruice fort agreable. Priant Dieu qu'il vous ayt Monsi. le President en sa saincte & digne garde, Escrit a Fontaine-bleau le 11. iour d'April 1602.

Ainsi signé

HENRY.

Et plus bas

RVZE.

Et en la superscription

*A Monsi. Viart Conseiller en mon
Conseil & President a Metz.*

*Autres lettres au Maistre Echeuin &
gens de Iustice de ladite ville.*

TR E S C H E R S & bien amez, l'accusa-
tion dresse'e contre nostre Procureur
Ioly, n'a fait que donner lustre a sa reputa-
tion: Encores que nous n'eussiõs qu'assez
d'assurance de sa fidelité, nous auons esté
bien content qu'elle ayt esté verifiée par
vn arrest si solennel, auquel nous auons
ioinct nostre declaration, afin que tout le
monde ayt part a la congnoissance que
nous en auons tousiours eüe, nous asséu-
rant qu'estant, comme il est vostre com-
patriot, vous serez fort ayse's qu'il ne soit
le premier d'entre les Messains, qui ayt
manqué au debuoir d'homme de bien a
l'endroit du Roy vostre protecteur, qui
prie Dieu vous auoir Treschers & bien
amez, en sa sainte & digne garde, Escrit a
Fontaine-bleau le 11. iour d'Apuril 1602.

Ainsi signé

Henry

Et plus bas

Ruzé

Et en la superscription

*A nos treschers & bien amez les Maistre
Escheuin Conseil & Treize de la ville de
Metz.*

